



17355

kat.komp


1

Mag. St. Dr.

P

PANEG. et VITAE

Biblioteka Jagiellońska



stdr0002908

P

I

2




ILLVSTRIS<sup>o</sup> AC EDISS<sup>o</sup> D. D.  
**PETRO TYLICKI,**  
 EPISCOPO CRAC:  
 DVCI SEVERIENSI  
 &c. &c.

In primo Episcopatus ingressu,

**GRATVLATIO.**

M. ADAMI OPATOVII.



**CRACOVIAE,**

Typis Ioannis Szeliga, Anno  
 Domini 1607.





1705 I  
**Q**UID prodest sublime genus? quid gloria Martis?  
 Si cultus veræ religionis abest?  
**A**E quiparas utròque tuos splendore Quirites,  
 Multos sed vincunt, clara trophæa crucis.  
**H**oc signo Constantinus sæua agmina fregit,  
 Ecclesię hoc frangas castra inimica tuę.



# GRATVLATIO.



AGNVM QVIDDAM VIDENTVR  
 suscepisse, I. A. qui virorum Illu-  
 strium, & Principum qui proximam  
 Deo potestatem in terris gerunt, pre-  
 claras & laudabiles virtutum actiones, æternis lit-  
 terarum monumentis student consecrare. Nul-  
 lum enim vnquam, ad orationis gloriam compa-  
 randam, illustrius argumētum reperitur, quam vir-  
 tus Principis intaminatis fulgens honoribus: aut  
 quam iustitia eiusdem, nullis quamlibet profusis  
 largitionibus peruia, nullisq̃ue afflictorum quere-  
 lis violata, aut denique quam in frenandis cupidi-  
 tatibus, & in calamitatibus ac iniurijs à vita, fortu-  
 nisq̃ue ciuium propulsandis, incredibilis & toties  
 spectata fortitudo. Versantur in manibus, non mo-  
 do imperitæ plebis, sed etiam virorum doctissimo-  
 rum, quorundam scripta, in quibus res omnium  
 iudicio abiectissimæ, caluitium, culex, formica, &  
 ipsæ hominum generi infestissimæ pestes, bellum,  
 stultitia, exquisitissimis laudibus ornantur. Quid  
 verò scripta, quæ optimum ac integerrimum Prin-  
 cipem, in omnibus vitæ partibus moderatum &  
 temperantem, plenum pudoris, plenum officij, ple-  
 num religionis loquuntur: annon in omnium o-



culis gestabuntur? annon summo studio euoluentur? Quod enim spectaculum, mortalium oculos magis capere, & sui oblectatione satiare potest? quam sanctissimi Principis imago, veris & non simulatis virtutum lineamentis animata potius, quàm descripta? quod tam iucundum acroama? quod tam suauissimis numeris deuinctum & modulatum carmen, magis demulcet & oblectat aures: quàm ea oratio, quæ ciuitatum populorumque moderatoris, purissimam & castissimam vitam, nullisque flagitiorum maculis inquinatam prædicat. Magnū est beneficium Dei, & omnium prædicatione maius, rerum humanarum arbitrum & moderatorem, in cuius manu, sint positæ opes, dignitas, & omnium vita mortalium, eum habere, qui cæteros, non tam altissimo dignitatis fastigio, quàm virtutum imperatoriarum amplissimo splendore antecellat. Huic, tanquam veræ interris imagini Dei, omnis terrarum orbis, solennibus laudum adoreis litat: huic, votis concordibus imperium diutissimum precatur, huic, laterum suorum oppositus, contra mucrones insidiantium promptissimè offert: suaque corpora paratissimus illi substernere, si illi per stragem humanam, iter ad salutem sit sternendum. Fuit, fuit semper, & est in hanc usque diem, singulari beneficio Dei, in hoc inclyto & florētissimo Poloniarum regno, optimorum & sapientissimorum Principū copia,



copia, qui non modo in Senatu sapientissimam  
 consilia dando, verum etiam in sanctissimis tem-  
 plis, sacra religionesque immortalis Dei, sapienter in-  
 terpretando, & fortiter propugnando, Rempub:  
 conseruant. Et quanquam innumeri clarissimi  
 viri reperiantur, qui, etiam huius mundi negotijs im-  
 pediti sunt, plurimum tamen prudentia & consi-  
 lio possunt, in periculis à Repub: remouendis: hi  
 tamen qui & fallacis mundi illecebris, & corporis  
 sui desiderijs abiuratis, totos se ac omnia sua, cul-  
 tui diuino manciparunt, plus cæteris animaduer-  
 tere, & tanquam è loco editissimo, procellas &  
 tempestates Reipub: denunciare, atque inprimis  
 fluctus turbulentissimos possunt componere. Hi  
 enim, dum aut in rerum sublimium, & diuinarum  
 contemplatione occupantur, aut dum ad religio-  
 sissimas aras, sacris operando, pro ciuium & Reip:  
 incolumitate, ad Deum omnis misericordiae beni-  
 gnissimum parentem, supplices manus tendunt;  
 nonne ipsius Dei, ac Beatissimarum mentium con-  
 suetudine fruuntur? nonne ab illarum admirabili,  
 & longè omnium præstantissima luce, mentis tene-  
 bræ discutientur? nonne cæteris sapientius, labo-  
 ranti Reipub: opem ferre, eamque è seditionum  
 procellis ereptam, in firmo ac tutissimo tranquilli-  
 tatis portu, collocare poterint. Vt enim res diuinis  
 ministerijs deuotæ, plurimum ex se venerationis



spirant, animosq; profanae multitudinis metu percellunt: ita in vins, ad Sacrosancta sacerdotij munera obeunda delectis, non modò varia, ac multiplicitis sapientiae luminaria, ( ita adiungente diuina benignitate, ) elucet, sed etiam nescio quid emicat diuinitatis. Atque equidem, I. P. cum ad te, in hoc longè omnium iucundissimo die, & in quo, ius laetitiae datum est publicè, oculos meos, illos inquam mentis, amorem tui ardens conceptum spirantes reflecto, dictu est incredibile, quam iucunda recordatio tuarum virtutum, animum meum subit, quibus officium, & prudentissimi in Curia Senatoris, & Sanctissimi in Ecclesia Dei Antistitis, tanquā preciosis ornamentis distinctum esse oporteat. Et cum vocem meam, animi promptissimi testem, & in hoc, omnis aetatis ac ordinis hominum, comuni gaudio, gestientis interpretem, continere non valeo; dabis mihi pro tua in omnes clementia veniam, quod homo, cum ab alijs rebus, tum à dicendi copia desertus, tantum mihi negotij sumam, vt tuas incredibiles virtutes, & quæ iam in omnium ore versantur, & quæ aliquando præstantissimorum hominum, & ingenij & orationis vbertatem fatigabunt & exhaurient: audeam tenui orationis filo pertexere. Quandoquidem ipsi Ioui, quem falsò antiquitas Deum putauit & coluit, non tantum cum pingues tauri ad aras cadebant, sed etiam cū

pauperis



pauperis angusta manus, tura adoleret, sacra fie-  
 bant. Et cum sint, propè infinitæ virtutes, quibus  
 & Senatoriam dignitatem, & summam in Ecclesia  
 Dei amplitudinem, es adeptus: tum ego illas qua-  
 tuor maximè sum admiratus, religionem, sapien-  
 tiam, iustitiam, amorem patriæ: quarum vt ante  
 multis iucundum fuit, in adolescentiæ flore luxu-  
 riam adspicere, ita nunc ipsi Reip: vtilissimum, v-  
 berrimos earû fructus percipere. Et religionis qui-  
 dem, & rerum diuinarum studium, non modo in li-  
 beris, & optimis legum institutis temperatis Re-  
 buspub: sed etiam in barbaris, & nulla humani of-  
 ficij ratione deuinctis nationibus, ita antiquissi-  
 mum & Sacrosanctum fuit, vt quibus initijs cætus,  
 ac societates hominum coire, vrbium mænibus,  
 locum designare cæperunt, ijsdem prima diuini  
 cultus fundamenta sunt iacta. Ita enim illa vetu-  
 stissima sæcula, quamuis in cognitione veri Dei, dē-  
 fiffimis ignorantia tenebris fuissent obsita, sibi per-  
 suadebant, esse quoddam supremum numen De-  
 orum, cuius potestate, arbitrio, nutu, cuncta in  
 hoc spatioso orbis theatro verterentur, & cuius in-  
 credibili, ac inuitata in genus humanum bonitate  
 pulcherrimi cælorum orbes, vario siderum splen-  
 dore distincti, eosdem inter se cursus constantissi-  
 mē seruantes, vicissitudines dierum atque nocti-  
 um, commutationesque temporum quadripartitas  
 & ad



& ad maturitatem frugum; & ad temperationes  
temporum aptas, efficerent: & cuius, hæc certissi-  
ma iustissimæ indignationis argumenta putarent,  
si quando, aut vehementiores & immoderata tem-  
pestates, vim magnam aquarum è nubibus, in agro-  
rum atque in hominum perniciem effunderent,  
aut filetales morbi lues, aut segetem in agris ene-  
caret, aut armenta in stabulis suffocaret, aut de-  
nique homines in ciuitate absumeret. Quare ani-  
mum adiecerunt, ad aras ponendas, & delubra sum-  
ptuosissima extruenda, in quibus varium honorem  
Diuis reddebât, vt imminetia pericula, à suo, & Re-  
ipub: capite auerterent, statumque rerum, & do-  
mi, & foris, florentissimum fortirentur. Sed poste-  
aquam tandem, illa lux, tot ardentissimis votis, ac  
desiderijs, sanctissimorum hominum, è cælo euoca-  
ta in terris illuxit, & illas à tot sæculis offusas caligi-  
nes discusit, tum demum verus atque illibatus re-  
ligionis cultus resplenduit, tunc denique oculos,  
ac mentem mortalium in se conuertit. Et quanquã  
blâdissimis voluptatum illecebris captæ ac delin-  
tæ mentes, difficulter, tanquam traballi defixæ cla-  
uo, ab illa quam simulata religio permittebat, vi-  
tæ impuritate, & dissoluta ratione ad hanc pудо-  
ris & sanctimonix magistram concedebant. sed ô  
magna vis veritatis, quæ te contra hominum inge-  
nia, calliditatem, solertiam, contraque fictas omni-  
um in-



tionē s  
certissi  
arent,  
tem  
agro  
erent,  
is ene  
aut de  
re ani  
ra sum  
nozem  
, & Re  
, & do  
poste  
tis, ac  
euoca  
caligi  
tus re  
culos,  
anquā  
delimi  
xā cla  
pat, vi  
pudo  
sed o  
n inge  
omni  
um in

um insidias, per te ipsam defendis, quid non potes?  
quid non audes? vbi semel animos hominum es  
complexa: tuum hoc opus, tuum beneficium est,  
quod illæ tristes Erebi facies, illa horrenda infer  
ni portenta, quæ se pro dijs venditabant, in palu  
des flammis sulfureis perpetuo flagrantēs, sint præ  
cipitata: tibi hoc acceptum ferendum, quod vnus  
in indiuidua Trinitate Deus, vbique terrarum ac  
gentium colatur & veneretur: tibi hoc tribuendū,  
quod plurimi molitie ex animo eiecta, vitam horri  
dam & asperam adamârunt. & quod cæteris rebus  
abiectis, cælum negata tentant iter via. Hæc tam  
diuina, & feracissima virtutum procreatrix, vbi a  
nimum tuum è sacro fonte excepit, & saluberri  
mis doctrinæ Christi præceptis, ad pietatem con  
formare suscepit: in tantas subito flammās religi  
onis tuendæ & amplificandæ excanduiſti, vt pro  
hac, non modò minas, pericula, capitis dimicatio  
nem adire, sed ipsum pectus paratis ensibus ob  
uium dare, dulce & decorum putares. Et cum pri  
ma initia ætatis, cupiditatum procellis sint obnoxi  
a, quarū æstu, plurimi à recto virtutis trainite abre  
pti, grauissima innocentia, integritatis, vitæ, fortu  
narum naufragia sūt passi, tu illam lubricam & fra  
gilem ætatem, tam sapienter regebas, tam cautè  
transigebas, vt nec affectus imperium rationis re  
cusarent, nec vnquam rationem, quod fidelissimis



pietatis monitis obtemperaret, pæniteret. Eluce-  
 bat iam tunc, morum triste senium, & aspectu gra-  
 ue, mira tamen suauitate conditum: illud quidem  
 odio vitiorum susceptum, hoc verò amore hone-  
 statis excitatum: illo homines improbiſſimi per-  
 cellebantur, hoc quique integerrimi ad virtutis  
 studia inuitabantur: ita vt in tuo iuuenili vultu, &  
 flagitiosi haberent quod metuerent, & optimi  
 quod imitarentur. Et veluti in teneris arborum  
 corticibus, variæ animalium effigies incisæ, vnâ cum  
 arboribus succrescunt, ita illæ notiones pietatis, in  
 tuo animo puerili consignatæ, robur & maturita-  
 tem suam, cum ipsa ætate conſequebantur. Cresce-  
 bat & augebatur iuuenile corpus: crescebat & ani-  
 mus religionis studijs adoleſcens: virebat ætas flo-  
 rida iucundum ver agens, virebat & animus hu-  
 ius se virtutis primæuo flore conueſtiens: mature-  
 ſcebat & iam ſolidæ ac corroboratæ vires erant,  
 matureſcebat & firmum tenaxque propositum di-  
 uini cultus promouendi. Et cum in omni vitæ par-  
 te, manifesta illius veſtigia imprimebas, ſed tum  
 maxime tanquam plenis velis inueſtus, ad laudem  
 & gloriam eius amplificandam prodijſti, cum ſpre-  
 tis rebus caducis, & vita tumultuante abiecta, ple-  
 num timoris ſacerdotij miniſterium, & operoſū  
 munus legationis, diuinæ gratiæ, ita diſponente  
 domino, adijſti. Intelligo l. P. quam difficili in  
 loco



loco verfer, quàm mihi sese vberriima dicendi materies offerat, quàm latissimus orationis campus pateat: sed me comprimam, & non patiar in eo loco mediocritatem meam periclitari, cui se præstanti ingenio viros, summa copia & singulari facultate dicendi, vix vnquam commissuros arbitror. Illud tamen, quasi pertransennam aspiciens, non possum strictim non attingere: serius paulò, & omnium expectatione serius, tuæ virtuti & meritis, debiti honores sunt delati: scilicet vt est vitium inuidiæ commune & peruagatum, eosque acerrimè & hostiliter inuadens ac deprimens, qui virtutis commendatione, & rebus preclarè gestis, ad regni beneficia nituntur: te quoque eo odio, quo antea omnes omnibus sæculis bonos aggrediebatur, est aggressum. Non pauci, qui te posterius ad Remp: accesserant, aut summos magistratus adibant, aut amplissima sacerdotia consequebantur: tu tamen nihil eo immutatus, de sedulitate ac fide Reipub: data, remittebas, quinimò nec sumptui, nec labori, nec valetudini parcens, maximis te ac difficilimis in negotijs exercebas. Neque enim sollicita ambitione, nec nimia honorum cupiditate adductus, infinitos rerum forensium labores sustinebas, sed cupiens ciuium & Reip: dignitati, atque imprimis religionis incremento, (cuius nunquam obliuisci poteras,) inseruire. Nec hic tuus animus



erat, cum oleo lætitiæ ad offerendam Deo hostiã  
 incruentã vngebaris, vt molestis & vsque in se-  
 nium protractis officijs, amplissimos & locupletis-  
 simos Episcopatus obtineres. Quid igitur mirum,  
 si in tanto inuidiæ incendio, animus tuus nullas flã-  
 mas concipiebat? si infractus virtutis iter vrgebat?  
 si strenuus molestiarum difficultates superabat? si  
 denique fortitudine sua inuidorum oculos per-  
 stringebat? Et cum humanarum actionum iustissi-  
 mus retributor Deus, vt nullum flagitium sine vin-  
 dicta, sic nullam virtutem sine proëmio permittit  
 abire, hanc primum, (ita crediderim,) iustissimo  
 & clemētissimo Sigismundo Regi, magnanimo re-  
 ligionum propugnatori, mentem inspirauit, vt tu-  
 is maximis, & ex animo profectis vigilijs, curis,  
 laboribus, meritos redderet honores. Nec quid-  
 quam moratus est, diuino dicto audientissimus  
 Princeps, teque quatuor honorificentissimis Epi-  
 scopatibus, qui se non ita longo temporis interual-  
 lo excipiebant, ornauit: Quos inter est hic Cra-  
 couiē. quem solenni & venerando habitu Pasto-  
 rali, die hodierno ingrederis, teque in medio po-  
 puli, tibi diuinitus commissi, cognoscendum sistis,  
 & quæ est consuetudo cum potestate in hanc vr-  
 bem ingredientium Episcoporum, ad reliquias B.  
 Stanislai supplex te aduoluis, & cum in illius locũ  
 successeris, ab hoc precibus contendis, vt etiam  
 nunc



nunc mortalitate exuta; & Beatorum consortio  
 fruens, in partem muneris & laboris veniat. Et cū  
 mecum, tuum admirabile studium diuini cultus  
 propagandi, quod superiorū Ecclesiarum guber-  
 naculis admotus declarasti, considero: non dubi-  
 to eum tibi præsto ad futurum. Tu namque hoc  
 tam diuino calefcens igne, non ea quæ tua essent,  
 sed quæ Dei, quærebas; tuque in primis pestes illas  
 ac perniciēs peculi j Christi, scelestissimos inquā  
 pestiferarum opinionum autores, nescio quo A-  
 cheronte excitatos, arcebas: tu Sanctissimas ædes  
 sacris & religioni Catholicæ consecratas, ab his  
 spurcissimis non hominibus, sed belluis violatas, &  
 nefariè occupatas, quantum in te fuit studebas re-  
 cuperare: tu ad ouile Christi fallacis doctrinæ la-  
 queis irretitas, & abductas oves reducebas, tu si  
 quid in tuo grege infirmum erat curabas, si quid  
 vitiorum labe respersum abluebas, si quæ vis mor-  
 bi pertinacis ingrauescens serpebat, ressecabas:  
 tu lætis & amænis pascuis verbi diuini, tu limpidis-  
 simis fontibus illius æternæ beatitudinis tuum gre-  
 gem reficiebas: tu denique providebas, ne flagiti-  
 orum contagio, in æternum deplorandas strages  
 faceret, sed vt alma salus, virtutum incrementis cō-  
 firmata, complexa omnes foueret: tu si quando  
 furiosa Hæreticorum rabies, Ecclesiæ dignitatem  
 eleuare, illius patrimonium dissipare, sacra, reli-  
 gionesq;



gionesque per summum dedecus contaminare, diuinamque suppellectilē, ex multo argento & auro, (quod illis multum dolet,) confectam, & gemmis (vt illis etiam vique eò doleat,) distinctam clarissimis sacrilegis oculis, rapacissimis manibus auferre conabantur, tu inquam inter alios magnanimos & fortissimos Antistites resistebas, priusque vitam tibi cripi, quam hæc te viuo violari malebas. Nescit profectò vera virtus quiescere nescit, sed per quæ vis ardua & periculosa viam sibi pandit, nec languere potest, vbi se honestæ occasionis illius exercendæ præbent. Quare frui hoc tanto & solo bono, hoc magnus & admirandus, quod sedulò facis, haberi stude; hoc illam quam spectas immortalitatis gloriam, de qua nulla vnquam ætas, nec illa vnquam intermoritura Beatorum præconia conticescēt, perpetuare contende. Iam verò quæ tanta dicendi copia, quod tam vberimum orationis flumen reperietur, quod innumeras tuæ sapientiæ laudes, quæ omnium pleno ore celebrantur, si non completi orando, at vel percensere commemorando possit. Primum illum ætatis iuuenilis cursum, non aliò deflexisti, quamuis multa quæ honestum mentirentur, te suis illecebrarū præstigijs auocare conarentur, quam ad augustissimum sapientiæ domicilium. Cuius in amorem ita exarsisti; vt non amplius discessionem cogitaueris

gitaueris, sed iam tum in animum induxeras, nul-  
 libi securius, nullibi fructuosius, nullibi iucundi-  
 us, nullibi honestius, non modo pueritiæ, sed re-  
 liquum vitæ cursum posse transigi. Hic tu primum  
 animum & aures dare cæpisti, illi Poëtarum con-  
 centui, cui saxa & solitudines voce respondent, il-  
 lis fabularum narratiunculis quibus teneræ men-  
 tes capiuntur, & ad honesti studium excitantur;  
 hic illa præcepta cognouisti, quæ orationis illumi-  
 nandæ, & totius Eloquentiæ accumulandæ artem  
 præscribunt; hic illius artis acumina perspexisti,  
 quibus in veritate propugnâda, re vniuersa tribu-  
 enda, latente explicanda vtitur: hic illius scientiæ  
 cognitionem es adeptus, quæ diligentissima per-  
 ueltigatione res à sensu cõmuni abstrusas & recõ-  
 ditas eruit, & in lucem profert; hic illam verè ma-  
 gistrâ & parentem vitæ Philosophiâ, quam Socrates  
 euocasse è cælo & in Urbibus collocasse creditur,  
 quæ Respubl, optimis legum institutis moderatur,  
 hominumq; cupiditates sese effundere, & impe-  
 rium rationis excutere volentes, tenet & coercet,  
 tua illa admirabili ingenij fælicitate excussisti; hic  
 tu iuris diuini leges & instituta non infinitis, &  
 concertationum plenis disputationibus, sed aucto-  
 ritate, & illo tibi diuinitus concesso iudicio, es ag-  
 gressus interpretari: hic multarum & diuersarum  
 gentium mentem mores instituta, rerumq; publi-  
 carum



carum varia principia, multiplices iactationes, &  
 luſtuosos exitus perſpexiſti, cum monumenta re-  
 rum geſtarum, omnemq; memoriam antiquitatis  
 euolueres: hic deniq; omne genus ſcriptorum o-  
 ptimorum, & ſaluberrimis vitæ regendæ præceptis  
 refertiſſimorum, delibaſti. Ita vt iure meritiffimo,  
 illud de tuo feruenti, & inexplēto ſciēdi ſtudio dici  
 poſſit, quod de ſuo Romanæ facundiæ Princeps  
 confitetur: quātum cæteris ad ſuas res obeundas,  
 quantum ad feſtos dies ludorum celebrandos,  
 quantum ad alias voluptates, & ad ipſam requiem  
 animi & corporis conceditur temporis, quantum  
 alij tribuunt intempeſtiuis conuiuiis quantum de-  
 nique alexæ, quātum pilæ, tantum tibi ipſi ad hæc  
 ſtudia recolenda ſumebas, atq; etiam nunc ſumis.  
 Excitant in agricola ſtudium culturę, vberriſſimæ fru-  
 ges agrorum: excitabant & in te ipſo laborem, cō-  
 tentionem, indiſtriā, illi in animo tuo tanquam  
 in culto & fertili agro, propè in diem effloreſcen-  
 tes, & ſapienter intelligendi, & beatè viuendi, læ-  
 tiſſimi fructus. Gaudet mercator, & totus lætitiā  
 exultans, non metuit fragilem truci committere pe-  
 lago ratem, cum ex mercium cōmutatione rem ſu-  
 am familiarem videt accreſcere: gaudebas & tu,  
 nec labori parcens, quidquam de ſuſcepto negotio  
 remmitebas, cum illas veras animi opes, opibus ac-  
 cumulatas augeri & excreſcere videbas. Laboris  
 namq;

namq; ibi poenitet neminem, vbi certa spes com-  
 modorum affulget, & vbi collectam animi ægritu-  
 dinem iucunda delectatio reficit. Satis hoc pro-  
 fectò, non modò ad sapientiæ nomen sustinen-  
 dum, sed & ad ipsam laudem parandam videba-  
 tur, cum pulcherrimum orbem, tot exquisitarum  
 scientiarum, tam vehemèti cum studio absoluisses,  
 sed tibi vni, qui hoc amplius quiddam animo su-  
 sceperas, non satis. Non enim tu eam sapientiam  
 ambiebas, quæ apud Græculos homines, conten-  
 tionis potiùs quam veritatis cupidiores, de propo-  
 sitis quæstiunculis, spinoso, exili, conciso, & tor-  
 tuoso orationis genere, in disserendo vtitur: sed  
 quæ ciuitates institueret, leges optimas scriberet,  
 hominum cupiditates frangeret, ius omnibus æ-  
 quum diceret, scelerum fibras, & prauæ elementa  
 cupidinis extirparet; innocentiam verò, integra-  
 tem, & mutuam animorum consensionem, in ani-  
 mis ciuium inlereret, hanc nosse cupiebas, hanc  
 ex veterum monumentis studiosè conquirebas.  
 Et cum hanc, Gymnasiorum parietibus inclusam,  
 mortuam & sepultam videres, in lucē atque adeò  
 in ipsam faciem Reip: prodijsti, eamque ad com-  
 munem vsum & utilitatem referre capisti. Erat tū  
 in Rep: nomen celebre, optimis quibusque Reip:  
 regendæ, tuendæ, amplificandæ, artibus instru-  
 ctissimi viri Ioannis Samoscij, cuius domus, no-



bilissimę iuventuti Polonę, quasi quidam ludus  
 & officina, & togatarum artium & militarium pa-  
 tuit; ad hunc concessisti, teque illi sapientissimo  
 & immortalī viro, qui de ingeniis hominum iudi-  
 care poterat, perpoliendum tradidisti. Quid hic  
 commemorem, qua ille in te animi propensione, in  
 Reipub: negotijs tibi ad expediendum mādandis  
 fuit, & qua tu in hunc fide, qua celeritate in con-  
 ficiendo eras? vix ille innuebat, tu effectum da-  
 bas; sapienter pręcipiebat, tu quoq; sagaciter pa-  
 rebas; ex bono & dignitate Reipub: negotia publi-  
 ca moderanda esse monebat, tu quoq; illius orna-  
 mentis & salutis, nihil tibi esse carius declarabas;  
 ita vt ille tuum incredibile in obtemperando stu-  
 dium, tu verò illius diuinam prope in imperādo sa-  
 pientiam, admirabaris. Ex quo, nihil vnquam ta-  
 le fuit, in quo tu illius in te amorem non agnoue-  
 ris, aut in quo ille, tuam industriam & solertiam nō  
 probauerit. Diuinus, & facile Princeps ingenii &  
 doctrine Plato, cum ingenij Aristotelici, acres &  
 celeres in perspicendo motus admiraretur, tanto-  
 perē in illius amorem exarserat, vt vnus illi instar  
 omnium, quibus operam in Philosophia nauabat,  
 esset; huiusq; absentis desiderium, illis amātissimis  
 verbis significaret, cum modò mentem, modò Ve-  
 ritatis Philosophum, abesse diceret. Quid ille vir  
 gloria, virtute, fortuna, rebus gestis, verē magnus,  
 cum

cum tuum, in illo iuventutis flore, qui domi sua,  
in spem regni, in patriis & auitis moribus institue-  
batur, indefessum studium in rebus agendis, sin-  
gularem prudentiam in difficultatibus expedi-  
endis, animaduerneret: non dubito, quod te eodem  
planè dicto, post præclare expedita negotia, men-  
tem appellando exciperet, cogitatione verò, suarū  
virtutum & sapientiæ, veram effigiem destina-  
ret. Plurimum debuit Macedoniæ regnum, fortis-  
simo Thebanorum Imperatori Epaminondæ, (cum  
quo illius gentis nominis celebritas caput, & cum  
hoc eodem funere ellata ac sepulta fuit, & de quo  
incertum erat, meliorne vir an Imperator esset,  
quod imperia non sibi sed patriæ quæsiuerit, & in  
quo mirabile videbatur, vnde tam insignis rei mi-  
litaris scientia, viro inter litteras nato fuerit,) quod  
Philippus obses datus, in ædibus illius haberetur,  
vbi illius virtutum exempla inspiciebat, atque eti-  
am in tantum imitatus fuerat, vt sordidum & ob-  
scurum Macedoniæ regnum, Græciæ & Asiæ cerui-  
cibus imposuerit. Non minus, eo nomine, regnū  
Poloniæ, Samoscij manibus acceptum referre de-  
bet, quod is non tam Imperatorijs virtutibus, qui-  
bus etiam plurimos veterum videtur superare, non  
tam ingenij & litterarum gloria, qua homines præ-  
stantissima doctrina adæquabat, gentis suæ nomen  
auctum & ornatum esse voluit, quam te tanto ci-



atq; domi suę educato; suorumq; morum, virtutis, constantiæ, pietatis, ingenij, sapientiæ, tanquam hærede instituto: vt quemadmodum ille, consilio & armis, grauissima pericula remouebat: tu quoq; (quod nunquam facere intermittis,) alienissimis temporibus huic ipsi Reipub: consilio, & auxilio præstò adesses. Quid igitur mirum, si neque Senatus, viris longo vsu, summa doctrina, excelentissimis ingeniis affluens, tuam illam promptam & expeditam indificillimis Reipub: negotiis explicandis sententiam, satis vnquam extollere potest: si neque exterarum gentium, Regumq; potentissimorum Oratores, tuam in responsis accipiendis ornatam, sapientē, rebusq; accomodatam orationis copiam satis demirari, nec apud suos commendare poterāt. Non etenim, vt est Theognis testis, è squilla, rosa nascitur, aut Hyacinthus, neque vt Poëta Venusinus canit. Imbellem feroces progenerant aquilæ columbam. Sed vt

Fortes, creantur fortibus & bonis,

& vt, est in iuuenis, est in equis patrum virtus: ita à viris, summo consilio, summa virtute, summa auctoritate, si nimirum alios informandos suscepint, non nisi eiusdem consilij, virtutis, auctoritatis, ciues sunt sperandi. Beatum te, I. P. quod eum ducem & autorem, ad hæc sapientiæ studia nactus fueris: sed longè beatior Rempub: quod virtus, & probi-

prôbitas eorûm Senatorum, qui vita sunt functi, in  
 aliis propagata refloreat, & publicè dignitati deser-  
 uiat. Sed iam, quæ tua mens, quis animus erat, in  
 iustitia colenda, & iure proprio unicuique tribu-  
 endo, profectò si meæ aures peregrinarentur, & si in  
 hac tam celebri, & peruagata huius tantæ virtutis  
 omnium prædicatione, tanquam hospites versa-  
 farêtur, tamen propter has, quas in te sum admira-  
 tus virtutes, illius obliuisci non possem. Sapienter  
 enim, ut cætera, parens & autor doctrinæ Peripa-  
 teticæ Aristoteles, illos dignos esse iudicauit, quo-  
 rum consilijs crederetur, si & probi, & prudentes,  
 & beneuoli essent, etsi quid horum trium abfue-  
 rit, non satis tutum esse monet, illos nostræ causæ  
 cognitores & patronos deligere. Nam si is vir pro-  
 bus erit, & nobis amicus, sed idem parum prudēs  
 & consideratus, facilè ipse in errorem prolapsus,  
 nos quoque in idem præcipitium aget: si autem  
 consilio & sapientia abundabit, sed improbo ani-  
 mo, & in nos malè animato fuerit, in fraudem in-  
 ducet potius, quam bono & salutari consilio pro-  
 derit; si denique fuerit, & prudentia & virtute spe-  
 ctata, sed nulla nobis necessitudine diuinctus, con-  
 sulet ille quidem rebus nostris bona fide, & sine fal-  
 lacia, sed tanto melius consulturus erat, si nobis  
 aliqua cum ipso intercessisset coniunctio. Quid tu,  
 cum ad te, amplissimum & laboriosissimum Pro-



cancelarij munus, voluntate optimi Regis, consensu sapientissimi Senatus, omnium verò ordinum summo cum applausu delatum fuisset, nonne quod huius magistratus officium est, cum ad causas cognoscendas, & iudicia exercenda accedebas, ab hoc trium virtutum comitatu deducebaris? nonne huic iuxta te locum deferebas? Aderat religio, probitatis, innocentiae, & cæterarum virtutum procreatrix, quæ diligenter prouidebat, ne vllis vnquam largitionibus, aut fucatis blanditiis, aut e mentitis rationum momentis, æquitatis ara expugnari posset, Aderat sapientia, quæ offusas fallaciarum tenebras discutiebat, & quæ, quid in quaq; re verum esset, reperiēbat. Aderat ciuium & patrię indefessus amor, qui ius suum vnicuique tribuebat, & ne quis vnquam dignitatis aut fortunarum detrimentum caperet, operam dabat. Dicebat grauisissimus Romanorum, & omnium officiorum momenta diligentissime perpendens, M. Cato: iudicem nec pro iustis orandum, nec pro iniustis exorandum. Quis hoc dictum melius? quis magis ad amicum in iure dicendo teipso expreſsit? qui vix vnquam, ac ne vix quidem, aliquo verbo compellatus, multis iactatam iniuriis, & multis exagitata contumeliis æquitatem eripiebas, & cui debebatur reddebas; & qui in causis iniquis nullius fauore, nullius gratia, nullius precibus, nec

nec vllis vnquam preciosis rebus, à iustitia te deflecti patiebaris. In cælum vsque M. Curius extollitur, quòd Samnites, cum sibi magnum pondus auri attulissent, illo dicto repudiauit, aurum habere, præclarum sibi non videri, sed eis qui aurum haberent, imperare. Maximæ laudi, C. Fabricio datum est, quod Legatus ad Regem Pyrrhum, oblata sibi ex gemmis & auro præstantissima regalis munificentia dona, accipere recusauerit. Tua vero laus, quo tam vberrimo ac fælici orationis flumine assequi? quibus tam præclaris Poëtarum carminibus exprimi? quibus denique annalium monumentis, ad sempiternam hominum memoriam consecrari poterit? cum nō semel, nec bis, vt hi Romanorum, sed quot erant causæ auscultandæ, tot maximis & sumptuosis muneribus, lacesitus & prouocatus, illa tamen, ne inspicienda quidem duxisti, sed præteriens, illam solennem tibi que toties vsitatam vocem reddebas, æquitatem in tuis iudiciis sine vllis præmiis, quenquam posse obtinere, iniquitatem verò, nulla vi pecuniæ, nullo auro etiam in vnum ex omnibus Gazis congesto, mercari posse. Quid hac voce maius, quid præstantius, non dicam reperiri, sed excogitari potest? vincit sua nobilitate, doctissimas sapientissimorum hominum sententias, quod hæ, animum quadam iucunditate perfundant, illa vsui & rebus humanis accomodata: vincit Le-



cit Legislatorum instituta, quod hæc illi, non sibi;  
 sed aliis viuendi rationes indixerunt, illa verò tan-  
 quam Sacrosancta lex, in tui officij religione sem-  
 per est versata: Vincit Apollimis, magno studio,  
 & magna veneratione, à cunctis nationibus quæ-  
 sita oracula, quod hæc ambiguis perplexa verbis,  
 plurimis perniciem attulerunt; illa plurimos, in su-  
 is fortunis collocauit, plurimis salutem & dignita-  
 tē reddidit. Ægyptij Sacerdotes, qui animalium, cæ-  
 terarumq; rerum figuris, tanquam litteris quibus-  
 dam, in animi sui sensibus prodēdis utebantur, iu-  
 stitiam designare volentes, corpus virginali forma,  
 sed cui caput ademptum esset pingebant, quasi  
 quod vt Seneca in Octauia conqueritur,

Neglecta terras fugit, & mores feros

Hominum, cruentâ cæde pollutas manus,

Astrea virgo syderū magnū decus, reliquerit.

In qua enim Repub: ac societate, vi & ferrores  
 geruntur, audacia, rapinæ, nefariæ libidines regnāt,  
 ciuium vulneribus Respub: cruentatur, Senatus  
 tamen obmutescit, iudicia conticescunt, ciues o-  
 ptimi lugent; seque non legum sed parietum præ-  
 sidio tuentur, ab hac iustitia voluntarium exilium  
 suscipiēs recedit, vniuersaq; sacra & prophana, la-  
 trocinijs diripienda permittit. Non sum nelcius, su-  
 periori memoria, magna cum diligentia, seuerita-  
 te, sanctimonia, iudiciorum vim, & grauitatem, cu-  
 stoditam,

stoditam & cōseruatam fuisse, sed si hæc perditā  
 atque profligata fuisset, tu hanc, ipsamq; iustitiam  
 reuocare, tu infamiam ac inuidiam iudiciorum re-  
 mouere, tu spem corrumpendi iudicii præcidere,  
 tu fidem in foro, auctoritatem in Senatu, religio-  
 nem in templis collocare poteras. Tibi enim iure  
 optimo, illud elogiū, quod M. Cic: de Bruto,  
 quem tanquam partem animæ diligebat, fecit; tibi  
 inquam, conuenit, Quid tam distans, quàm à seue-  
 ritate comitas? quis tamen vnquam te, aut san-  
 ctior est habitus aut dulcior? quid tam difficile, quā  
 in plurimorum controuersis diiudicandis, ab om-  
 nibus diligi? consequeraris tamen vt eos ipsos,  
 quos contra statuebas, æquos placatosq; dimitte-  
 res: itaque efficiebas, vt cum gratiæ causā nihil fa-  
 ceres, omnia tamen erant grata, quæ faciebas. Di-  
 utius forsan, quàm debui, I. P. hoc inani & impo-  
 lito verborum strepitu, tuas patientissimas aures  
 videbor alicui, & tibi ipsi, detinere: mihi verò in  
 hoc spatioso, & floridis ac virentibus tuarum vir-  
 tutum meritis consito campo, etiam hoc modicum  
 & instar momenti videtur, sed ne molestus sim, &  
 ne, quod res est, videar parua naui, maria velle e-  
 metiri & transmutare; ad portum me si non plenis,  
 attramen non fractis velis recipiam; Si vt quondā  
 Vlysses, non prius post tot res aduersas & infertu-  
 nia perpeffa, regno paterno, & optatæ quieti red-  
 ditus



ditus est, quàm Phœacum regionem lustrasset: ita & ego facile exitum orationis reperiam, si priùs aliqua de tuo vero & perpetuo in Remp: amore commemorauero. Et cum mecum, tuam superiorem vitam, multis in molestiis & difficultatibus actam recogito, & iam præsentem, cum in iisdem curis & laboribus exerceri intueor, quin exclamem, continere me non posum. Ecquando finis erit malorum? ecquando mordaces & sanguisugæ discedent curæ? ecquando hæc catena malorum, in qua molestia molestiam, calamitas calamitatem trudit & excipit, euoluetur? Itane, etiam ne in hac, non tam senili, quam defessa & attrita negotiorum Regni difficultatibus ætate, quiescendum erit. L. Lucullus, postquam tot imperia, à populo Rom: sibi demandata gelisset, & postquam primus Romanorū, cū exercitu Taurū montem transisset, Asiam aggressus fuisset, Tigranis & Mithridatis copias fregisset, reliquū ætatis pacatæ vitæ & tranquillæ dedit. Scipio verò Africanus, fulmen Imperij Rom: Punicę fraudis & audaciæ domitor, ipsiusq; Carthaginis opulentæ & munitissimæ expugnatior, & gloriæ satietate captus, & motuum ciuiliū pertæsus, vitam ruri in otio cum dignitate egit. Quid prohibet, quo minus & tu, tanto exemplo Clarissimorū virorū, hoc graue & negotiosum munus curandæ Reip: in aliorū humeros reclines, & hoc

hoc quodcūq; restat vitæ, publicis laboribus fatigatæ, cur non aliqua iucunda & honesta quiete recreas & confirmas? amor scilicet, quo summo-  
pere patriam complecteris, non patitur, non permittit, sed intimis animi ardescens medullis, ad Reipub: curas anxie & sollicitè hortatur. Hic te ab adolescētia, in hos fluctus & tempestates ciuiliū rerum coniecit; hic persuasit, vt difficillimam moderandæ Reipub: artem cognosceres, hic autor fuit, vt illam forensem: & rebus agendis accōmodatam orationis facultatē, (qua apud exteros Tulliani visi sumus,) consequerere: hic efficit, vt oēs sine diuturna molestia, sine impensa, etiā sine patrono, paratissimum rerum suarum perfugium in tua prudentia haberent; hic vt pellem & perniciem à Rep: consilio sapientiaq; propulsares; hic denique, vt cum illa ciuium à suo Principe voluntatum alienatio fuisset facta, & Regni status in maximum discrimen adductus, suscepta Regis nomine Legatione, contendisti etiam cum vitæ discrimine, vt & Principis optimi dignitas, sarta & tecta esset, & vt offensionibus oblitteratis, in mutuū amorē & concordia exardescerent, cōmunemq; Remp: cōmuni studio & amore cōplecterentur. Verè sæuus est, & crudelis amor, illorumq; rationibus inimicus, quorū animos vrit, his verò benignus & fructuosus, qui nos sibi eo deuinctos habent, Et quanquā plurimi fuerunt,



sunt, qui diuersa amoris sui in Remp: monimenta,  
 extare voluerunt, & aut instructissimis copiis pro li-  
 bertate dimicando, aut cum hoste in certamen singula-  
 re euocato manu conferendo, aut ciues flagitiosos  
 vrbe prohibendo, mortem oppetierunt: sed quid  
 tam ciuibus optabilius, quid patriae saluti, quid  
 Reipub: gloriosius, quam sine caede, sine ferro, non  
 modo hostiles acies conficere, sed excitatas in Re-  
 pub: tempestates, consilio regere, & quadam diui-  
 na propè moderatione sedare. Illi enim, sapius au-  
 dacia, & inconsulto gloriae studio incensi, aut ipsi  
 occubuerunt, aut fortissimo exercitu amisso, hosti-  
 viam ad Rempub: opprimendam muniuerunt: hi  
 aut nullo milite conscripto, aut paruis copiis colle-  
 ctis, sed nullis non modo signis collatis, sed ne bel-  
 li signo dato, hostem ad deditionem & ad manda-  
 ta accipienda saepenumero compulerunt: illi vix a-  
 liqua patriae salute allata, è vita sublati, plura & ma-  
 iora amoris sui argumeta declarare nequiverunt; hi  
 meritis, & gloriae superstitibus, quoties Respub: fra-  
 cta malis, debilitata dissensionibus, abiecta metu  
 periclitatur, toties hanc saluberrimis consiliis, ad  
 spem libertatis & pristinae dignitatis erigunt. Quare  
 Homericus ille Rex Regum Agamemnon, plures  
 sibi dari Nestorea prudentia viros, quam Achillea  
 fortitudine milites, ad opes Priami, & gentem Tro-  
 ianam euertendam, optabat. Quidquid enim turba-  
 rum,

rum, in eius Castris iracundus & furiosus Achilles  
dabat, totum hoc sapientissimus Nestor; maturo  
consilio, atque incredibili prudentia sedabat. Hæc  
sunt tua trophæa, I. P. hi arcus triumphales, quos in  
hac publica omnis ætatis hominum lætitia, ex tuo  
primo ac fælicissimo in hanc Episcopatus Sedem  
ingressu, tuis maximis togatisq; virtutibus erigi-  
mus, & statuimus. Quorû, non hanc rudem operis  
structuram, sed in his rerum à te gestarum imaginẽ;  
aliquomodo adumbratam, quis non demirabitur?  
quis non amplectetur? quis non prædicabit? nisi  
aut quem, alienis bonis mærens inuidia inuaserit  
sed inuidia virtute parta (vt Tullius dicebat) glo-  
ria non inuidia putanda; aut nisi quis, nullam victo-  
riam dicendam, nullum triumphum, nisi ex hoste  
deuicto agendum esse existimabit. Sed quæ belli  
ratio difficilior, quæ periculosior esse potest, quàm,  
cum prædonibus animarû, cum hostibus salutis hu-  
manæ, tot fallaciarû artibus instructissimis, in cer-  
tamen descendere? & pro Christi hereditate, pro sa-  
cris & aris, pro ritu religionis Apostolicæ decerne-  
re? hominesq; nescio quibus furiis ac præstigiis ve-  
xatos, vt rebus diuinis bellum indicant, ab illarum  
contactu prohibere? Qua ex pugna cû semper vi-  
ctor redieris, an non meritò, hoc præsertim tẽpore,  
quo tua merita amplissimis præmiis ornata, & om-  
nium bonorû faustis acclamationibus prosequuta,



exultant & triumphāt, religio quoq; triumphabit?  
 an non vel his triumphalibus statuis decorabitur?  
 Quid verò numerosus & fortissimus miles, quid  
 machinæ bellicæ proficient? nisi Resp: ea pruden-  
 tia viros habeat, qui & belligerendi consilia submi-  
 nistrent, & fines imperii armis prolatos tueri sciant.  
 Qua cū semper, dubiis & formidolosis Reip: tem-  
 poribus, præstò adfueris: quid est, cur non etiam  
 triūphi honorem cōsequatur? Iam quæ est laus, quæ  
 dignitas, gentes immanitate barbaras, locis infinitas  
 superare, æquitatis verò nullam certā legem tenere,  
 profectò nulla vis externa tam subitò, quàm hoc v-  
 num, presentissimā perniciem publicis rebus potest  
 accelerare. Hac, cum ex æquo ius dicēdo, salutem  
 & dignitatem Reipub: tuebare, hæc ipsa etiam or-  
 namētis triumphi cumulata exultet. Quid deniq;  
 prodest, nouas dominationes bello cōparare, impe-  
 rij nomen augere, si ciues ea fide & amore, in patriā  
 fuerint, vt hanc pecunia inducti, parati sunt pro-  
 dere: sed cum, tuum verum & constantem in om-  
 nibus rebus amorem retinueris, meritò huic etiam  
 triumphanti applaudimus. Quare, cum hoc pul-  
 cherrimo virtutum triūphantium comitatu, ingre-  
 dere fælix & fortunatus primariam tui Episcopa-  
 tus Urbem, ingredi & occupa, debitam tuis ma-  
 ximis virtutibus Sedem; ingredi augustissimum,  
 & Sacratissimis B. Stanislai reliquiis celeberrimum

Tem-

Templum; & quod vnū, effusis ad Deum precibus  
optamus, vtinam huic ipsi quam diutissimè præsis;  
& vt nunc faustissimis gratulantium votis, pro tua  
incolumitate susceptis, hunc tuū Episcopatum in-  
grederis, vtinam ita olim vtinam, cælesti ap-  
plaudente Curia, lætus Cælum ingre-  
diaris.

## PROSPHONISIS ACADEMIÆ.

**A**NTISTES Christi, sacrarum gloria rerum.  
Ecclesiæ lampas, columen pietatis auitæ,

Exortum sidus Craci regione vetusta,

Pontificum virtute micans, pastoris amore,

O decus, ô TYLICI, Lechi de stirpe Quiritum.

Quam te cerno lubens, venerorq; insignibus auctum

Pontificis Craci, Solenni more petentem

Augustas sedes, sanctoq; cruore rubentes:

Non me tecta tenent, mirâ dulcedine captam,

Conscius haud paries, curæ, studiiq; tenacis.

Effusam retinere potest in gaudia mentem,

Munere prorumpens medio, proprioq; penate

Obuia processu, cætu comitata meorum.

Moribus vt Spartana grauis, cultūque seuerō.

Excita, diffuso totam sermone per urbem,

Aduentare grauem spoliis certamine natum,

Quem circum plaudens fundit se armata iuuentus,

Exsilit, atque gradum gestit coniungere campis:

Sic mea, fama loquax, compleuit limina postquam,

Illuxisse diem TYLICI, quo sumat honores

Præfulis, atque suum ingrediatur Pastor ouile,

Occupat



Occupat exultans subitò mea corda voluptas,  
 Hunc populis Craci, referare Palatia cæli,  
 Ingenium cuius, prima uo in flore iuuentæ  
 Instruxi recti monitis, studiisq; Sophôrum,  
 Quemq; mei memorem longâ asuetudine feci,  
 Nec mora, lætitiâ totis stimulatâ medullis,  
 Extra tecta, tuos vultus, plaususque requiro.  
 Ipsa ferens plausum, conceptaq; pectore vota:  
 Faustis ô vtinam auspiciis, atque omine fausto,  
 Ingrediare tuam sedem, prendasque sacratas  
 Fælix ô vtinam Christi ditionis habenas.  
 Te duce, te ô vtinam fidei diuortia cessent,  
 Perfida nec rabies ausit temerare vetusta  
 Sacra Dei, aut dotem templis auferre dicaram,  
 Omnes sed Christi veniant sub iura benigni,  
 Amplexi veteres ritus, & dogmata prisca,  
 Conatusq; mei, curæ, vigilesq; labores,  
 Quos animis iuuenum, impendo studiofa colendis,  
 Semirutis penitus tectis, & paupere censi,  
 Præmia si meritis nequeunt condigna referre,  
 Vi propriâ serpent, lætosq; dabunt tibi fructus,  
 Si me si placidis oculis, vultuq; sereno  
 Multis defessam curis, studiisque seueris  
 Adspicies, mestræ propulsans nubila mentis,  
 Sique meum Genium, quouis tutabere casu.  
 Sic voueo, sic mens denunciat ipsa futurum  
 Auguriisque istis, etiam tibi sidera sponder.

